

惟
清
齋
全
集

梅庵文鈔卷之一目錄

表

恭進八旗詩鈔表

奏疏

恭進八旗詩鈔疏

籌辦楊村官刱事宜疏

籌辦新漕事宜疏

調劑浙江旗丁疏

嚴杜旗丁藉端冒開疏

籌撥衡工欸項疏

官民急公奏請鼓勵疏

籌議南漕事宜疏

清查倉庫彌補章程疏

籌辦東河事宜疏

卷之二目錄

徐州協改設總兵疏

籌辦宿州奸民滋事疏

吳淞海防疏

縷陳太湖情形疏

籌辦海防章程疏

籌議河務事宜疏

籌議阿克蘇錢局章程疏

恭謝

恩加三品卿銜疏

長子瑞元鄉試中式謝

恩疏

梅庵文鈔

長

表

恭

進八旂詩鈔表

伏以

神臯祥發羣材分川嶽之靈

化宇文同七萃衍詩書之澤包垓垤而鼓舞泳

德咸符浴日月而遵游依

光自近蔭成喬木綿拱衛於億齡業在名山普裁成於

衆製觀風典鉅

化雨恩隆

臣

鐵保誠惶誠恐稽首頓首上言竊惟書成

汗竹代有篇章雅美飭荼是鍾靈淑丹陵若水奧區誕
聖之鄉夏諺豳風福地歌勤之什臯颺禹拜產竝近於
姚墟棠芾桃蕢句徧傳於陝汭然而八元八愷起自名
家汝鳩汝方收之敵國竝值龍興而佐命未偕鳳翽以
矢音降自嘉劉誰爲周召或馳驅草野著作未遑或翊
贊軒墀謳吟遂廢迨乎太平旣久大雅遂興輶軒徧於
八方庠序深於六義而詩陳寶鼎非沛上之英客滿瀛
洲無晉陽之產極之襄直周恪杞梓楚材胥入網羅咸

陪奔奏論勲宿衛詞詎炳乎丹青盡瘁前驅技且窮於
病競未聞吹漁邇化竝附歌薰鼓吹從征且能肄雅近
則振振鱗角道備親賢赳赳虎賁才兼文武璧府換周
廬之彩光與星輝戟門聯幽谷之芳章依漢倬有若
今日之盛者也欽惟

皇帝陛下

禹文敷海

舜治從風

政在養民賜雨錫蘿圖之福

事必稽古圖書承麟紱之傳

七德綏而秦蜀氛清大經先正

一心盡而衛漳波靖盲說胥芟

嗣幸院於九年干支竝叶

續藏書於四庫山海兼包悉遵

家法以觀文遂協

天心之佑

聖九夏譜由庚之樂弦誦達於瀛壖六軍騰脫甲之歡

詠歌洋於桂楫

天潢嚮學柏梁聯燕喜之篇卿月承猷槐位協鳳儀之

瑞合官學宗學而造士子弟知書胥同姓異姓以興賢

春秋上計惟此八旗之臣庶全憑

列聖之生成初則數取三單繼則名符八陣色分鑲正中軍奉黃屋之威考列源流太府藏丹書之籍鴨江派近從征旣盟以河山鴻澤居安先附亦隸於臣僕駐防兼內外居行儲武庫之兵胥宇共憂歡賞卹費水衡之幣戰餉守餉養成禦侮之才世祿世官榮與登科之選持戟嚴更之署親瞻舞羽於堯階釋冰壁水之門飽聽論鐘於周圍置官師而立教示以大防觀禮樂而宣和導之善氣溯二十一家之紀載

文德誰同合百六十載之甄陶雅才竝起惟

國恩浹於禁旅食德能言况

御集頒在儒林修辭有式雖聯珠合璧

戒祥瑞於勿言而東壁西清許

成韶以共聽本支貴戚家有

賜書一介單門人多專集幸作

皇朝義樸爭鳴盛於止戈非無帝世巢由亦效忠於擊

壤值

重熙之慶典各獻篇章歌三輔之

新恩有裨紀載竹匏駢奏梨棗漸多叩鐘分大小之鳴
吹律異陰陽之應將門貴其多藝儒塾傳以專長未經

睿鑒之刪存每慮衆言之紛雜

臣

授書束髮觀俗乘輅

徧求國雅之愜心益覺土音之悅耳古詩人之遺韻近在枌榆鄉先達之大篇多存篋笥集裘未遂辟蠹恐疎竊念河嶽英靈向多彙選齊魯文學今有專鈔况茲旗籍之簪紳幸傍羽林之部署先澤倚

邦家之庇曾附風雲大旨貴忠孝之言敢誇月露臣久思廣集未敢上

聞輒從述職之餘敬有採詩之請

宸聰兼聽

帝志旁求俯鑒鑽研親承

指示臣粗知下學深昧別裁搜玉有年揀金無識重蒙九重之燭照

命資衆志以成城有待編摩先加鈔撮溯自

作山伊始文物已肇於

興京暨乎定鼎大同人才倍隆於

壽宇體

展親之義首列宗英誌翊運之榮次登朝彥或後先憑諸仕版百官之表可稽或分合視其科名千佛之經全列白駒音遠山林有自逸之身赤管微明閨閣多可存之句幽潛均錄位號畧詳述作竝註於行間篇章悉收

諸身後單詞亦採羣雅畢陳名或因詩而存言不以人而廢幸觀成於衆手自比保殘雖就正於同官終慚示璞疆圻寄重敢分小臣求牧之心洙泗源通敬倚至聖刪詩之筆伏願

幾餘鏡秉

論定衡懸集金聲玉振之大成操六變九流之總轄曰貢俗曰見志經

鑒定而風雅道存或旨緝或文繁奉

品題而源流理匯寵頒

御序小言附二典之巍

榮錫嘉名故紙賁三都之麗譬諸芝莖麥穗邁

皇風而史乘畢登庶幾玉海珠林邀

睿顧而儒宗益貴

臣

學荒挂壁識蔽正牆聞滄浪而詎

解辨聲遇錚于而不能素響慕昔人之敬梓幸邇典型
效童子之歌衢敢忘諷誦細書石室三寫愁似豕之譌
訪籍金臺羣言惜雜魚之蝕勉收散佚思廣流傳既奉
絲言仍慚舉一復三之悟果叨

車指得窺襲六爲七之原從此曰雅曰頌曰風後四始
而播諸金石立言立功立德先九州而

錫以章相世僕承

恩永戴

君師之教

皇輿鞏吉長延詩禮之祥謹編次凡例一卷目錄一卷
詩一百三十四卷校錄告竣

臣鐵保無任瞻

天仰

聖激切屏營之至謹奉

表隨進以

聞

奏疏

恭進八旗詩鈔

賜名熙朝雅頌集

御製序文具摺謝

恩疏

奏爲恭謝

天恩事五月十九日內閣奉

上諭我國家景運昌明文治隆茂八旗臣僕涵濡

聖化輩出英才自定鼎以來後先疏附奔奏之倫其足
任干城腹心者指不勝屈而於騎射本務之外留意謳
吟馳聲鉛槧者亦復麟炳相望前此鐵保在京供職曾
有採輯八旗詩章之請經朕允行茲據奏進詩一百三

十四卷請賜書名朕幾餘披覽嘉其搜羅富有選擇得
宜格律咸趨於正而忠義果敢之氣往往藉以發抒存
其詩實重其人益仰見

列聖培養恩深蒸髦蔚起正未有艾爰統命名熙朝雅
頌集竝製序冠於簡端以垂教奕禩非徒賞其淹雅博
麗之詞也著將原書發交鐵保付之剞劂用昭同風盛
軌焉欽此仰惟我

皇上神樞成化

心矩敷言承

家法而鞏金湯藝先騎射

觀天文而章雲漢

治洽謳吟惟茲七萃之勁兵近備億齡之世僕羽林星
衛稟

廟算而奏效止戈璧沼風從歌

國恩而嗣聲論鼓雅言

教立人知忠愛之陳通志書成

帝許藝文之載

錫名拜寵存其詩益重其人

製序覃精採其本不逐其末

道隆彰輝著人心風俗之綱維

化洽生成溯

祖德

考恩之培養文期載道貴織靡之畢刪職在宣勞尙公
忠之同勵臣學疎四始道景三雍奉
聖謨知雅頌之音釋

天語思艱難之業

獎及搜羅之富受

寵益驚

示以期望之深酬知敢懈編摩有幸得窺
昭代典章文武兼資請告

熙朝臣僕荷甄陶於

列聖世澤能言遵矩矱於吾

皇

天章共仰詠歌不廢宜歸大雅之程弓矢自彙莫負習
勞之

訓邇者兩階

敷德羣孽胥殲四隕

綏豐大河永靖

赫升夏至八風符十稔之占澤繼春膏旬雨慰

三壇之請

神京日近騰歡聞擊壤之聲上塞雲高

講武裕干城之用謳歌益盛合億萬方同頌嘉祥喜起
攸符超三百篇更陳大樂所有臣感激下忱理合繕摺
恭謝

天恩謹

奏

籌辦楊村官剝事宜疏

奏爲籌辦修理北倉廩座並楊村官剝事宜仰祈

聖鑒事竊查北倉爲南糧截卸之所官剝爲北河挽運
之需所關甚鉅乃近年失修廩座倒壞船隻破損若再

因循不辦不過三二年全成廢物彼時再議興修糜帑
悞公殊乖政體臣查目下情形尙易籌辦不甚費力謹
就愚昧之見及現在辦法爲我

皇上陳之

一北倉厥座原爲南糧截卸之用法至善也乃近年失
於修理墻垣倒壞厥座塌陷若再不及早修辦竟成瓦
礫之場實爲可惜雖本年將就存貯米石終非長策查
直隸現在被水自無閒欸可撥又不便請動庫項臣再
四籌畫北倉旣專爲截漕而設卽不妨就漕項內暫時
籌欸修理查該倉舊存廩四十八座先經天津縣估修

銀一萬二千餘兩臣到天津後卽率同該縣親赴北倉
逐厰細加核算約估銀八千二百兩應行請

旨勅交直隸督臣檄行天津府楊志信督同天津縣認
真修理先於天津道庫剝價欵下墊用臣再於南漕各
糧道庫內旂丁扣存備公項下酌量提出歸欵一轉移
間旣備將來截漕之用又免沿途露囤之虞而春間以
工代賑於津民亦不無小補矣

一楊村官剝船除撥運銅鉛外共存船一千四百隻現
在修補可用者一千餘隻餘俱破爛不堪卽此千餘隻
本年叠遭大水磕碰擊損亦必得大加修補方可濟用

臣查上年護直隸督臣顏檢因修脩船隻令船戶自行辦理不肯認真是以

奏交該管州縣承辦今此次修脩剝船仍屬有名無實若再歸次令州縣辦理勢必仍假書差之手如前貽誤因循數年全歸無用彼時再議修補所費甚鉅查楊村通判既係經管剝船之員自應一手辦理以專責成而免推諉現署通判劉寶第人尚明白頗知以公事爲急應請

旨俟漕糧剝竣後不必再歸各州縣水次卽齊集天津令天津道詳細查明將應大修小修及賠補者分爲三

項督飭楊村通判及時認真修脩不得有名無實其應
用之項先儘本年應支油艚銀兩如有不敷爲數無多
卽飭令平日修脩不堅之該州縣照數賠出以昭炯戒
其有未滿年限不堪用者本應該縣賠造姑念原造之
船板薄釘稀不便竟令賠補應卽令其雇覓民船補數
以濟公務至應發工食等項銀兩交各該州縣選擇正
身船戶出具保結令天津道率同楊村通判當堂親放
不得假手書差以清積弊

以上二條俱係北漕急須辦理之事如蒙

俞允臣卽在天津多駐一兩日面諭天津道府各員認

真籌辦俟

臣

明歲督漕北上時查核是否妥協責有攸

歸再行聲明具奏奏上得

旨依議行

籌辦新漕事宜疏

奏爲今冬新漕事宜必須預爲酌籌詳定章程以期經久無弊恭摺

奏請

聖訓事本年辦理清漕一切章程尙未細定雖勉強支持不致貽悞究屬一時權宜補救之法若不從長熟籌無論別無津貼之項卽設法料理總非經久之計

臣於

督押幫船北上一路體察情形並與各省糧道隨時籌酌所有今冬應辦新漕事宜除有例可循各條臣自行實力籌辦外謹酌擬最要六款爲我

皇上陳之

一日嚴兌開查有漕省分惟山東係上年改作春兌其餘冬兌冬開例有定限如有遲逾卽干嚴議乃向來幫船捏報開行往往遲至半月二十日尙未離次推求其故緣州縣開倉本遲一切浮收折色及弁丁勒索貼費必須私定章程耽延時日迨至歲底具文一報不但並未開行抑且尙未兌足是以幫船過淮不能依限現在

浮收陋規已除有何難行必任意遲緩累百姓而滯漕
運且明年係全漕起運計多十五幫又無閏月限期緊
迫更不容稍有捏飾應請

勅下各督撫臣申明定例嚴飭各屬及早開倉於例限
內全行兌足次第長行以免沿途節節遲逾倘有幫已
抵次而米不如期兌交及

奏定旂丁津貼各款並不按數隨糧給發則悞在州縣
或船已報開而各丁猶稱購備食米及一切器具尙未
辦齊逗遛水次則悞在丁弁應俱責成糧道府州監兌
各廳就近嚴密查察何處遲悞卽分別揭叅照悞漕例

辦理過淮時臣仍按幫查核如有遲逾該管道府一併查叅庶地方官不敢視爲具文兌開如限到壩可免逾期而百姓無守候之苦受益無窮矣

二曰慎米色查向來安徽湖廣江西等省米色尙皆乾潔惟江蘇浙江不能一律固由於地處窪下亦緣該處本係賦重之區州縣向視徵漕爲利藪卽可藉此爲折色浮收地步而不肖丁弁又樂於從中沾潤只問陋規之多寡不顧米色之參差南北通融縣幫一氣此向來之積弊也乃本年弊竇肅清而到壩之幫仍有因米色不純致有虧缺叅處者皆因初次辦理清漕糾察甚嚴

不敢過事挑檢啓旂丁勒索州縣之風貽百姓買換守
候之累惟是江浙所收米石向稱上等自食中等糶賣
下等完糧臣細加延訪確有此弊不特上年撫臣岳起
所

奏係屬實情卽前漕臣楊錫綬亦早有此議伏查漕糧
首重米色水次旣不能乾潔到壩焉有好米現在漕政
肅清州縣並不敢浮收百姓仰沐

鴻慈至優極渥若再不將好米交倉天良何在臣俟開
倉時移咨江浙督撫諸臣并行該管糧道知府通行嚴
切曉示閭閻務將上等之米輸納

正供不得仍前留爲自食藉稱地氣使然輒將潮雜之米交倉致啟州縣弁丁藉詞需索以杜弊端而清源本三日選運弁查一幫額設千總二員原係分年輪流領運間因初選之弁不諳運務照例扣運一次另行派員接辦或因人缺不甚相宜將本幫之弁調委別幫運務此向來辦理成例上年經順天府尹臣閻泰和條奏嗣後僉派領運責成本幫千總不得無故濫行調委等因經前漕臣蔣兆奎於未到任之前途次議覆准行在案臣半載以來悉心體察閻泰和所奏係爲杜弊防私起見自屬可行而揆之實在情形有斷難拘泥不得不仍

照舊章辦理者查從前各幫以陋規多者爲美缺今辦理清漕旗丁不得貼費又明奉傳行不肯濫應千總亦無從勒索况現須熟手領運之幫必係極疲方規避之不暇斷可保無夤緣圖謀之弊若不論其才具之能否概令本幫出運運弁不得其人即使有款調濟亦難以有限津貼聽旗丁任意花費迨至辦理不妥縱據實查叅公事已悞似非核實辦公之道且各省州縣尙不時更調又何拘於未弁惟查從前運弁多有隔省互調之案未免太無節制自當予以例限以昭慎重應請嗣後如有新選之弁不諳運務或實有人缺相需必得另行

調委者總在本省各幫內揀派或於候補標弁內委辦不得率將別省幫弁互調庶於變通之中仍寓節制之意運務亦收得人之效矣

四曰恤水手查水手身工從前原無定例嗣於雍正年間查照省分幫次遠近酌定工價

題明在案近年生齒日繁一切食物昂貴原價不敷養贍亦實在情形歷年水手暗向旂丁勒索遇良善之丁隨時酌加卽妥爲償挽狡猾之丁並不加給必致釀成事端本年節次津貼旂丁伊等毫無沾潤亦覺向隅臣思與其暗中勒索有加無已不如明定章程既可安貼

衆心卽奉行亦昭畫一應請自今冬新漕開行起于例
給身工外南糧各幫重運每船每石頭舵水手加給大
錢一千文回空加給大錢五百文東豫各幫程途較近
重運每名加給大錢六百文回空每名加給大錢三百
文如此予以限制在各丁不過於調劑項下少分十分
之一二不致卽形拮据而水手得此加增亦可相安於
無事倘仍敢不法滋生事端卽欽遵

諭旨查照本年張湖廣等案分別辦理以儆刁風庶情
法均昭平允

五日節運費查旂丁運費不敷皆緣陳累積壓錢糧到

手先了私事在水次已全行花費是以雍正年間

奏准將各丁應得折色行月銀內一半給發開船一半
解淮仍扣留三分之一交運弁帶北以資回空食用伏
查旂丁額領各款錢糧多者約四百餘兩少者一百數
十兩若僅將行月項下扣留一半統計不及十分之二
三其餘錢糧盡在水次放給不特無知之丁任意花銷
卽謹慎之丁亦難免浮費迨至長途需用無出轉藉稱
回家措費棄運潛逃抵通無可完公不得不重利挪借
種種窒礙固屬旂丁不知撙節亦向來辦理不善之所
致也現在疊奉

恩旨盡法調劑本爲濟運而設若先以此項銀兩彌補私債轉置公事于不問卽再議津貼亦何能填無底之壑殊非徹底澄清之道應請自今冬爲始除向來例應解淮之欸照例解淮外行令糧道核計每丁應領新舊錢糧共有若干開行應需若干置辦器具應需若干沿途提溜打圍應需若干節節算清按段支放所餘銀兩至通壩全行散給則

帑不虛糜功歸實濟公事全而私累亦輕于旂丁大有裨益其應如何酌量緩急遠近按期支放之處臣與各糧道詳細籌畫辦定章程咨部存案

六日籌公項查漕船自次開行以至通壩道遠幫多旂丁或賣貨耽延或吝惜繚費處處遲滯不能不需委員催儼向來因有陋規一切薪水舟費不但足用且有盈餘往往視爲美差本年辦理清漕旂丁不得貼費所有沿途陋規實有不除自絕之勢而此等委催之弁係留標試用者居多本屬自備資斧在淮効力刻下差委動須千百里之遙三四月之久若不量加公費不特徵員力所難支且恐劣員藉口向幫丁需索亦不可不防其漸臣查總漕衙門向無備公銀兩無可開銷亦不便另動公款惟有今春調劑江南旂丁項下曾經

奏明每船扣留銀四兩每年約得銀一萬三千餘兩爲將來陸續贖田之用此項銀兩閒貯道庫現在尙無用處今擬酌提銀一萬五千兩交淮安府發典按一分起息每年可得息銀一千八百兩內除差委實缺備弁有現支廉俸毋庸支給盤費外其餘候補各員以及隨漕各項兵役按照道里遠近分別銀數多寡酌給以昭平允年終造冊咨部如有盈餘俟積有成數將原發本銀提還道庫卽取盈餘一項常川生息如此以公濟公旣可杜絕陋規微員又不至賠累洵屬一舉兩得於差務可收實效

以上六條臣係按照現在情形參酌從前例案以期新運益臻妥善臨時不致周章謹

奏奏上得

旨依議行

調劑江安旗丁疏

奏爲旗丁造船賠累應酌籌調劑事竊臣等遵

旨確查旗丁運費情形已另摺酌撥款項幫貼奏蒙

聖鑒在案惟查旗丁運費之外造船一項最爲賠累今運費雖爲疏通可以撙節辦理迨遇造船之時除官給銀二百八兩外旗丁每造船一隻貼賠銀七八百兩至

千兩不等不免借貸周章從前緣費無所出是以因循至今若再不亟爲調劑則丁力益憊於漕務仍有妨碍臣等再四思維欲爲增補既無項可給又無款可借公同商酌就江安情形惟有裁減船隻既可節省

帑項而所減經費撥爲本幫造船之用實屬大有裨益惟是本年十二月內准戶部咨江西撫臣張誠基奏請

裁減船隻爲旂丁籌給運費經部議駁今臣等復議裁

船似與部議相左但江西運船裝米一千餘石若裁減漕帶未免過重難行且江西裁減船隻仍將十年大造官給二百八兩之款作爲津貼是裁船而不裁造船之

項本非正辦至上下兩江五十八幫運船三千餘隻每
船原裝米六七百石與江西情形大不相同如議裁減
每船灑帶不過二三十石及四十石不爲負重可無淺
剝之虞臣等擬將上下兩江之船按幫均勻酌行裁減
計減船一百六十餘隻可節省造船官項三萬三千餘
兩至應得行贈銀米等項卽留爲幫貼大造之用蓋船
已裁減無所謂造是以將官給二百八兩之欸節省其
裁船之額運米石仍然灑帶通幫行贈等銀原係按米
支給之項自應散給旂丁所以扣存不給旂丁者擬留
爲造船之費各幫均得實惠自所樂從計運船大造每

船可幫貼銀一百數十兩至二三百兩不等以裁減之
有餘補修造之不足挹彼注茲甚爲便益臣等爲旂丁
造船苦累起見謹就江省情形酌籌調劑繕摺具

奏奏上得

旨依議行

調劑浙江旂丁疏

奏爲調劑浙江旂丁運務與江南情形相同應請畫一
辦理仰祈

聖鑒事竊照江蘇安徽兩省幫丁前經臣會同督臣費
淳就分給州縣銀米內劃出給丁並將行月米石按照

市價交州縣折銀給丁以資運費等因具

奏欽奉

硃批依議速行欽遵在案嗣據浙江漕白二十一幫旂丁周明義等疊次具呈重運開行限迫運費實有不敷籲懇於本年漕截項下每船請借銀一百五十兩分限扣還等情臣查此項漕截銀兩係應今冬隨漕放給之款現在尙未徵存無憑動借况借款辦公雖寬裕於一時必拮据於後日誠如

聖諭殊非切實調劑之道當經諭令該丁等速回水次並嚴飭該管道衛督率迅速兌開不得貽悞將原呈駁

同亦在案伏查浙江運道比之江南本遠而該省各幫上年又逢輪減所有起運一切修艚船身置辦器具無不倍加工費前兼署浙江撫臣書麟摺內所開各丁應領應用經費清單每船不敷銀自一百二十餘兩至一百九十餘兩係屬實在情形現在江安二省疊蒙

聖恩俯准照

臣

等所奏量爲調劑所有浙江旂丁自應

一體請

旨辦理以昭畫一查浙江杭嘉湖三府屬各州縣每收米一石例徵漕費錢數十文不等其白糧亦有春耗餘米應請將此項隨徵漕費錢文一體給丁白糧二幫前

此調劑案內並無二升七合六秒晒颺耗米可撥本屬
向隅查該省每正耗米一石有春耗米三斗爲數較多
應請卽於州縣春耗米內酌撥六升給丁每船約可得
米四十餘石值銀六十餘兩臣現在飛飭糧道核明確
數統計漕幫每丁可得銀二十餘兩白幫每丁可得銀
六十餘兩以爲濟運之資又各丁應領本色行月米石
亦請令州縣照依市價變賣折給各丁卽可減價另備
口糧稍沾餘潤以上二條江浙兩省情形相同似可一
律辦理但查浙省行月米石應支本色者其數較少於
江安卽准其折價尙不能大有濟益查各丁因從前積

欠庫項甚多錢糧半爲扣款經兼署撫臣書麟等將各幫丁借撥行月食米應繳價銀三萬九千四百四十九兩零彙同造船公借等款

奏請統於本年冬運爲始分作十年扣還接准部覆令於嘉慶四年冬全數歸款臣愚昧之見分限十年爲時太久官項不便虛懸而銀數有三萬九千四百餘兩之多一時措辦在旂丁實有不能之勢合無仰懇

天恩酌中賞分六年歸款卽從本年冬運起扣以紓丁力出自

聖裁再查回空丁船不虞負重如准其加帶土宜於各

丁生計更有裨益應求

皇上恩准令各省回空船隻於例帶土宜六十石外照重運多帶二十四石以資運費在旂丁得免過關之稅而沿途出賣落地稅銀仍可照常徵輸亦不致多虛課額以上各條俱無糜

帑病民之事如蒙

俞允現在該省幫船亟須開行卽求

皇上訓示以便趕緊辦理謹

奏奏上得

旨依議速行欽此

嚴杜旗丁藉端冒開疏

奏爲嚴杜旗丁藉端冒開之弊以裨實政事臣查漕船一切陋規現在盡行革除此內尙有名爲辦公實則滋弊應行酌量裁革者如各省幫船全單一項向由臣衙門將起運船糧數目核明填註發交糧道從運弁起至監兌等員逐一鈐蓋印信幫船過淮簽盤時呈送臣衙門核驗復發幫收執到通由運弁逐層呈投坐糧廳倉場戶部戶科又逐層查驗令運弁守候繳銷止一全單其煩瑣如此因而不肖運弁伍丁明知呈驗全單在南在北均不免守候需時幫船難以停待卽藉此需索散

丁盤費並借打點各衙門名目任意捏報開銷就交出
賬目核算每幫費銀一百餘兩不止實爲漕務之累臣
愚以全單必須查驗辦理無事周章竟應責成司漕大
員經理不必假弁丁之手以清弊源嗣後全單飭發糧
道後卽由道遞行押運領運廳弁等官蓋印仍歸糧道
繳送臣衙門備文徑交坐糧廳俟幫船抵通交糧後卽
呈送倉場侍郎由倉場侍郎咨送戶科戶部照例核驗
轉咨臣衙門備案如此辦理則弁丁既不涉手需索捏
開之弊不禁自除至各幫行抵宿遷縣之皂河口向有
運河通判粘簽蓋印呈報河督具

題臣查漕船出入境汛日期既經隨時

奏報似可無須再

題以歸簡易又重運各幫行抵天津關卽須將糧道給
發起運船糧細數批文一張專差赴戶部戶科呈送查
核伍丁之勒索散丁其弊與投驗全單等臣查各幫既
有全單可憑原毋庸另起批文徒增輾轉應請一體裁
革以免滋累以上數條去之在公事毫無所損而伍丁
冒開之弊無從施其伎倆於漕運殊有裨益謹
奏奏上得

旨著照所請行欽此

籌撥衡工款項疏

奏爲衡工需銀緊急暫撥東省款項以濟要工恭摺馳

奏事

臣

於二月初二日接准河南撫

臣

馬慧裕咨稱衡

工自興築以來形勢極爲順利惟採買正雜料物必得
放價購覓方可源源到工有備無患現在應發料價夫
工等項尙有不敷若待奏請必致悞公煩於東省庫款
內借撥銀三十萬兩委員速解到工等因飛咨前來
臣查衡工將屆合龍款項最關緊要必得料物齊集人夫
踴躍方能一舉蕆功早慰

聖懷而東豫直隸三省地方受福亦復不淺

臣

何敢不

權緩急少分畛域現於上年

奏明留備本省工賑各款內撥動銀三十萬兩委員趕緊解赴衡工以備急用至東省工賑各費需用亦繁目前尙可應用將來如有不敷容臣隨時請

旨辦理所有撥借款項緣由理合恭摺由驛具奏奏上得

旨鐵保心無畛域深得大臣之體欽此

官民急公奏請鼓勵疏

奏爲官民踴躍急公懇

恩鼓勵以昭激勸事竊東省沿河兩岸本屬平行黃流

奔注漫溢成災若不加築堤埵春汛瞬息處處堪虞但
道里亘長實難尅期蒞事臣率同藩司陳鍾琛原任道
崔映辰等分赴各沿河地方親履查勘與各州縣紳士
及鄉耆人等熟籌防護查有惠民縣白龍灣地方最爲
險要上屆黃河決口該處漫溢浸及府城今年黃水初
至時知縣王柱卽親詣防守購料築堤衆鄉民見本官
爲民禦患不辭勞瘁各願出力每人自攜椿木一根稍
料一束相約而至者日得三四千人數日內築成四里
長堤城池村庄得免淹浸臣至堤上見北風催浪沖汕
堤身尙有村民二百餘人設窩舖二十四座晝夜看守

臣當卽賞銀一百兩以爲犒賚之用又濟陽縣文生員王振清吏員康國寧首先捐料集夫率同村衆於喜字等約地方築堤保護數十村庄又齊東縣武生王亮圖王獻圖鄉民王作臣常清文姚士潔等倡率鄰近村庄築堤兩道各積長三五十里保護廬舍無數以上三處皆臣履勘時所目擊者又據藩司陳鍾琛稟稱長清縣監生常文傑於紙坊等庄捐備料物築堤防護亦甚急公臣查地方偶遇灾患官能實心爲民民肯出力助官殊堪嘉尙知縣王柱能於黃水驟至時感動村衆備料出力數日成堤則其平日尙得民心可知文生員王振

清吏員康國寧武生王亮圖王獻圖監生常文傑鄉民
王作臣常清文姚士潔等雖爲保護田廬起見而於地
方利害緊要之時不避艱難首先任事洵屬踴躍急公
似應量予優獎以示勸勉相應據實
奏明可否仰懇

皇上格外

天恩將惠民縣知縣王柱給予知州頂戴仍留本任以
爲任事得民者勸文生員王振清給予訓導職銜吏員
康國寧武生王亮圖王獻圖監生常文傑給予八品職
銜鄉民王作臣常清文姚士潔給予從九品頂戴以示

鼓勵之處出自

聖裁臣爲激勸官民起見不揣冒昧謹恭摺具

奏伏乞

皇上睿鑒

訓示遵行再查惠民縣白龍灣係官爲倡率鄉民公同出力應查明村庄交該縣捐加賞銀二百兩齊東縣堤身最長除王亮圖五名外尙有分段倡辦者應交該縣查明酌給匾額花紅以示榮寵合併陳明奏上得旨卽有恩旨欽此

籌議南漕事宜疏

奏爲敬陳管見仰祈

聖鑒事竊查河口淺阻糧船不能及時歸次卽使日內
開通全漕渡黃已到臘月是明年新漕必得速益求速
方免遲悞而速之之法全在同力合作設法撙節計常
年自臘月二十邊開壩糧船過江至五月中旬全漕過
淮爲時不下五月明歲又幸有閏若能早爲開兌刻期
過淮似尙不致過遲

臣受

恩深重不敢因已離總漕之任遂同秦越謹就愚昧所
見爲我

皇上陳之

一旂丁與地方官受兌開行宜不准一刻延緩也查向來旂丁挑揀米色與州縣兌米遲延總不過爲爭兌費起見州縣不肯多交旂丁不肯少要紛紛爭執必各遂其欲而後已以致糧船延玩不開總漕能管旂丁而不能催州縣督撫能馭州縣而不能制旂丁糧船遲開一日卽過淮耽誤一日今若將開兌耽延日期極力催併計一日一幫亦不過需時三月何虞遲緩現在雖諸弊肅清不至如從前爭執但地方官與旂丁交兌諸項亦須趕緊辦理此事須總漕與本省督撫同力合作寬嚴並濟俾州縣不至過費而旂丁亦不至拮据方能有濟

相應請

旨明年新漕飭令總漕與督撫公同查辦軍船經本年
守凍丁力已疲凡州縣應折給等項必得如數早完或
實爲調劑俾得置辦器具預備身工總漕亦須嚴禁各
丁不准在水次任意勒索開行既早到淮必速再加以
閏月可不至漕限遲逾矣

一明年重運渡黃宜酌量辦理也查歷年糧船到淮偶
遇黃水過大清水過小或風色不順卽不能僨渡再遇
起剝過淺尤耽時日臣就現在情形而論如糧船尙能
歸次受兌仍照向例辦理倘竟不能歸次莫若令總漕

酌量機宜先將軍船空放過黃其由水次送米剝船竟於黃河北岸上兌則可省臨時起剝之累亦速益求速之一法也

一糧船行走次序宜以受米爲先後也查歷年照例開行自可依府縣次第而進明年米石由剝船趕運雇船有遲早之不同到淮有前後之各別若必拘幫次開行等米等船必多遲緩且糧船到通原有一定米數但能如數抵通何須過拘縣分應請明年漕米無論何縣一經過黃卽行兌入大船載足米數儘先行走每十幫派衛備一員丞倅一員入山東境再派叅遊一員嚴催挽

運庶抵通不至遲緩矣

一旂丁貨物宜令其趕緊剝送以資接濟也查旂丁所賴以營運者全在搭賣貨物而江廣各幫尤甚如不能趕運則立形拮据於公事大屬有礙應請令總漕速諭各幫旂丁趕緊回次將應帶貨物用小船剝送與漕米一同上船庶接濟有資挽運不至周章矣

以上四條臣爲速運利漕起見以補吉綸前定章程所不及是否可行伏乞

皇上飭交陳大文吉綸等就近參酌核議施行爲此謹奏奏上奉

旨所奏尙是足見留心政要欽此

籌辦東河事宜疏

奏爲籌辦地方河道事宜恭摺奏

聞事竊照地方應辦事宜理應酌籌緩急以爲先後方
免顧此失彼東省秋闈業已完竣十月初接辦武場約
二十內外可以蒞事臣卽應赴東三府查閱營伍往返
必須月餘惟是現在本省急應查辦之件莫先於運道
一事去冬因黃水經過不能掣水挑挖合龍後糧艘盛
行無時不上煩

聖厪臣督飭廳汛起剝撈濬費盡人力始免稽阻今冬

若不認真大加挑挖舊淤不去新淤再增於明歲新漕
大有關礙自未便僅派員經理致滋草率臣擬於武闡
完畢後親赴濟寧與徐端面商一切檢派妥諳河員會
同地方官限以寬深丈尺分段興挑務較往年加倍深
通以利運行又臨清一帶官設剝船必須一律修艚完
備用歸實濟臣卽順道親往查驗以免地方官將就弊
混再查濮范等州縣前因黃水漫溢支河淤墊一遇大
雨時行水無歸蓄附近村庄積澇爲患此亦不得不及
早籌挑保衛十餘州縣民田廬舍并可引水濟運但上
下游河道錯雜綿長臣現派濟東道兗沂道督同丞倅

各員分投查勘各按地方情形繪具圖說妥議稟復

臣

亦與河

臣

商定再行籌酌辦理至年例查閱東三府營

伍容

臣

於來歲春再行定期前往如此量爲先後次第

舉行庶地方河道不致稍有延誤是否有當理合恭摺
奏

聞奏上得

旨所見甚是欽此

清查倉庫彌補章程疏

奏爲密奏清查倉庫彌補章程仰祈

聖鑒事竊查東省倉庫虧缺經前護撫

臣

岳起前撫

臣

陳大文和寧先後

奏明清查並酌立彌補章程陸續歸款通飭遵照在案
臣到任後聞各州縣多有明補暗虧轉展移墊節年彌
補而原虧仍在二百萬上下

臣復

奏請設局清查以歸核實當與藩司陳鍾琛委辦清查
局運司丁堦等飭令各該州縣將虧缺實數由府加結
具報茲於八月初一日送齊逐一核算計從前原報二
百四十萬今尙虧正雜各款錢糧共一百八十餘萬兩
其中抵墊及應支應扣細數雖尙需細算大致虧缺總
數不至舛錯

臣

查東省積虧由於歷次河工城工賠累

現任各員接受前虧求免處分又不免挪移補苴若照例查辦俱屬咎有應得惟通省人數衆多轉展相因爲日已久究與無故虧缺者有間我

皇上如天之仁亦不忍概繩以法更恐革職離任人多雖盡法嚴追有名無實不如就現任人員勒限交納公項得以早歸實貯臣與藩司再四籌酌除虧缺最多之萊陽樂安二縣臣謹遵前奉去其太甚之

諭旨另摺叅奏示懲外其餘各員爲數較少臣卽遵照前

旨無論人虧已虧俱責成現任人員按數彌補其中有

本任虧缺者則按其銀數多寡自三月以至三年勒限嚴追限滿不完卽指名嚴叅辦理至彌補之法臣現擬定章程十五條總以上下各衙門裁除浮費各州縣卽省銀兩查照前撫臣所開彌補銀數核實酌定以期款項均歸實濟而又不致有勸捐派累擾及民生之弊通計每年各州縣可彌補銀二十餘萬兩若得仰蒙

皇上洪福年穀順成地方無事寬計六七年可以全數歸欵總之彌補之法宜緩不宜急貴實不貴虛日積有功衆擎易舉臣等受

恩深重斷不敢稍有懈怠任不肖州縣久懸

格項也所有辦理緣由謹密摺具

奏並繕彌補章程恭呈

御覽

臣

卽率同司道認真核辦仍將每年彌補准數於

年終密奏請

旨伏祈

訓示遵行謹

奏

一彌補之法宜分清前後依次歸款查嘉慶四年清查共缺銀二百四十萬兩除歷次彌補外現尙缺銀一百八十餘萬兩應照上次章程核實酌定提取各屬節省

銀兩先補本縣次及同府再及外府同力合作公同籌補每年通省共可節省銀二十餘萬兩再加外省及本省追出銀兩合之現在缺數約計六七年可掃數全完一彌補之法宜分別本身前任以昭公允查各縣接前任虧缺與自行虧短者有間今擬將本身任內自虧之員分別嚴追數在千兩以內勒限三月一千兩至五千兩勒限一年五千兩至一萬兩勒限二年一萬兩以上勒限三年倘限滿仍不完繳均查明照例叅辦

一本身有虧之員已離本任尙在東省亦照前定期限分別勒追其未經完繳之前不准題補委署應請咨者

不准給咨

一已離東省各員每藉詞交代清楚逍遙事外若任其推諉於情理未得其平應將改官外省及告病丁憂回籍有着各員分別照規定之限咨追如敢觀望挨延撤回東省查辦

一凡陞遷別任及丁憂降調告病人員原可照數咨追並非無着之項但此等離任人員散在各省究難剋期追齊今擬將此項銀兩俱着落現任先行彌補不准委之前任俟追出若干再於彌補數內扣減以歸實濟

一叅革病故各員在嘉慶四年清查以前者查明實係

人亡產絕徒事催呼終無實濟應竟免其着追其在四年以後者除仍照例咨追外仍一面着落現任人員於酌提節省銀兩通融彌補以杜現任人員推卸地步一州縣因公墊用銀兩例應司庫領回歸欵未領之先皆列入交代作抵此項銀兩一日不領卽正項一日懸宕應將司庫應領各欵逐一查明分別給領劃解正項錢糧以歸實在

一虧挪之項每多以衣物公館等項估價作抵通省核算不下數萬金此等物件接之前任交之後任名爲流抵日久則衣物糙舊公館塌壞歸於無着查交代以什

物作抵授受之員俱屬非是今擬提省酌中估價售變
各歸原欸其不敷之數着落原交與接任人員各半分
賠此次清查之後再不准以無用之物流抵以絕弊混
一所屬庫項有正欸雜欸之分驟難悉數歸補應先清
正項錢糧次及雜欸以分緩急

一所屬倉穀如勒令買穀歸倉勢難尅期集事應按每
石七錢先將穀價歸補提存司庫隨時酌量情形逐漸
買補以實倉儲

一虧挪實數惟交代時易得底裏如接任之員不肯遷
就其源自絕無如扶同徇隱積習相沿牢不可破現在

寬其已往此後如再有續虧銀兩惟最後出結之員是問道府不嚴行查察一體叅辦

一道府爲親臨上司耳目切近此後如有續虧除本員嚴叅查追治罪外其不敷之數按照該管道府到任日期知府賠十分之七巡道賠十分之三以重責成

一此次清查由該管府州吊查檔案造具冊結送局復核倘有隱飾遺漏着落該管府州分賠

一此次彌補係就各州縣每年節省之數公同酌中核議並非強人以難不得藉口彌補任意推卸應令各按限期如數解司倘有玩延卽將該州縣撤離本任提省

嚴催

一現在所查虧空之數俱係由各府縣自行呈報雖大概不至懸殊其中將本任虧數推之前任者在所不免而改官去任之員又往往於咨查時不肯承認徒費案牘十追九空臣現交清查局逐員細查寬以期限倘有以上情節查明將有心推諉之員指名叅奏其在別省現任各員如不肯認追卽調回東省核算以杜新舊支吾推卸之弊

以上十五條臣與司道及在省府縣公同虛衷核定衆議僉同理合繕寫清單恭呈

御覽奏上得

旨督率所屬認真彌補欽此

梅庵文鈔

長白鐵保梅庵著

奏疏

徐州協改設總兵疏

奏爲四省連界要區副將不足以資彈壓仰懇

聖恩俯准改設總兵以重揔防事竊照江南徐州府地方南連安徽之宿州靈璧亳州北接山東之兗沂二府其西則與河南之虞城永城夏邑三縣接壤處沛宿蕭碭之衝爲四省之扼要古稱重鎮民俗强悍各州縣地勢犬牙相錯匪徒易於藏奸又兩岸黃河每遇要工動

輒集夫數十萬人彈壓匪易漕船往來尤關緊要上年宿州匪徒滋事距徐州僅數十里使徐郡兵力強盛何致滋成鉅案臣鐵保俱所目擊夫兵可百年不用不可一日不備與其懲創于事後莫若靜鎮于幾先臣鐵保前在京請

訓時曾將徐州地方緊要原設副將不足以資彈壓情形面行陳

奏仰蒙

聖鑒茲查徐州現設河標左營副將一員馬步戰守兵八百九十名除分撥睢寧豐縣沛縣夏鎮等處防守城

池汎地及沿河催漕護解人犯等項差使外實在存城
戰守兵不足二百名實係地廣兵單且界隣則省呼應
不靈聲援未能聯絡自徐州至督撫河漕諸臣駐劄之
地相距五六百里至千餘里不等皆不能朝發夕至地
遠則勢苦孤懸官輕則聲威不壯奸徒易於玩視人心
難期鎮靜惟有仰懇

天恩俯准將駐劄徐州河標營副將改爲徐州鎮總兵
歸總督統轄仍就近聽總河節制卽將附近徐州之蕭
營及安徽之宿州山東之臺莊營額設官兵改歸徐州
鎮總兵管轄各營應領兵餉等項各歸本省支領其不

數戰守兵丁卽於江南督漕撫各標內酌量抽撥足額
毋庸另增應添養廉等項亦於本省通融籌辦至總河
一標額設四營今旣劃撥左蕭兩營改歸徐州鎮應請
於漕標所轄九營內酌撥兩營歸總河管轄另撥沿河
有漕一二營歸總漕管轄以符營制如此一轉移間不
但四省扼要之區得重鎮彈壓日臻寧謐該處好勇強
悍之民亦可藉行伍出身化無用爲有用矣奏上得

旨依議行

籌辦宿州奸民滋事疏

奏爲審明蒙宿州滋事各犯定擬具

奏仰祈

聖鑒事竊蒙宿匪徒肆逆不法所有勦捕淨盡經

臣等

恭摺馳奏在案嗣

臣

等行次宿州欽奉

諭旨飭令將此案應行審辦各犯詳悉訊明起事根由定擬具奏緣劉茂修籍隸蒙城向習白蓮教與南平廳屬之余瞎子卽余勇先素相交好余瞎子以算命卜課爲業曾言劉茂修命裡大貴劉茂修遂潛蓄逆謀勾黨授徒妄造無量壽佛求家鄉老母大發慈悲等咒語稱係老祖師所傳並不說明姓氏十一月內劉茂修與余瞎子並同教素好之樊名揚余連蔡同印盛潮凡吳景

山等商議起事謀逆樊名揚等各皆依允余瞎子以十一年正月初一日大雪卽可動手劉茂修卽私設僞職封樊名揚李潮士爲都督余連爲侯爵余瞎子蔡同印爲軍師盛潮凡吳景山爲總管紀四爲元帥派王德修馬思義趙恂余山領兵劉潮貫樊二樊四余勇余松督陣王樸爲先鋒余連賤售地畝打造軍器其餘地畝亦不耕種樊名揚又輾轉糾約入教夥黨訂期起事宿州知州熊載陞微有風聞卽差人密行察訪嗣地保赴南平廳首告余連所雇打造軍器之鉄匠陳山聞知地方官訪查亦赴廳呈首南平同知陳洪緒卽會同宿州親

往查拿獲犯邱德欽等九名余連等已焚燒莊屋攜眷
逃往蒙城縣盛家莊並告知劉茂修劉茂修見事機已
露復與余瞎子商議余瞎子以本年逢閏臘月初一卽
算正月諸事皆吉該匪等遂決計於十二月初一日先
行搶占亳州再赴河南復令樊名揚余連柴士信盛潮
望余勇半截張卽徐張相魁江敬禮馬蟠張仁等先
赴亳州糾約夥黨購買火藥並留人作爲內應又聞官
兵將至復令樊平育頂樊名揚姓名與余瞎子隨同巡
查差役進城分辯爲掩飾之計一面約會同教人等隨
後起身至鄆家集會齊嗣各處盤查嚴緊余瞎子等被

蒙城拿獲樊名揚不敢進亳州卽另赴別處糾約余連等仍回盛家莊同劉茂修向蒙城地方奔竄路過汪家莊汪學位想起劉之協犯案時汪貫曾作線訪拿遂放火焚莊報仇至豐家集屯住經兵前往捕拿劉茂修帶領男婦分起先行劉克已等率衆抗拒劉克已中鎗身死同夥劉潮貫等三十二名俱被擒維時劉茂修已沿途糾約夥黨千餘人盤踞官家寺逼脅良民替他喂牲口做飯所過之處居民紛紛逃竄至賀家大莊值天雨車輛難行劉茂修卽佔踞民莊制造旂幟令箭等物至初二日大兵齊集四面進勦劉茂修等執旂督陣號召

夥黨分投捨命抗拒經官兵鎗箭齊發並拋擲火彈焚燒莊屋劉茂修等俱被打死焚殺甚多始各潰散向東南奔竄又經官兵追勦刀砍矛戳殲斃多名其餘俱被生擒並未逃脫此該匪等起意謀反及官兵勦捕情形也臣等連日研鞠各犯初猶含混妄供嚴加熬訊始據供稱實係白蓮邪教及起意謀逆各前情不諱案無遁飾查該匪等胆敢於

光天化日之下有心謀逆實屬罪大惡極神人共憤雖首犯劉茂修已被官兵殺死據李潮士指認屬實仍應剉屍梟示以彰

國法而快人心余瞎子李潮士盛潮望余勇卽王得成
紀四劉朝貫等六名均應依謀反大逆不分首從凌遲
處死律凌遲處死梟首示衆臣等於審明後卽分別判
屍凌遲梟示其臨陣擒獲教匪石德等三十一名或已
經入夥未敢持械抗拒且於官兵追捕之時跪地乞命
或甫聽從糾約卽被拿獲究與在場拒敵者有間應請
照聞拿投首例發往黑龍江給索倫兵丁爲奴例應緣
坐之婦女幼孩盛鄭氏王勝等五十二名口應請照例
給付功臣之家爲奴均另行造冊咨部其先後盤獲各
犯內有被賊擄脅之良民王曹陸劉氏等男婦幼丁六

十九名口概予寬釋鉄匠陳山聽從教匪主使打造軍器多件雖經聞拿投首應仍照私造軍器十件以上例杖一百流三千里地保趙成德既經呈首應免置議樊名揚卽樊牛先經蒙城拿獲今訊係樊平育頂冒仍應照李潮士等所供樊名揚年貌嚴行通緝獲日另結搶獲鎗刀旗幟分別銷燬陣亡兵丁懇請照例議卹打杖出力兵丁分別拔補賞犒并遵

旨出示曉諭民人此番止辦滋事匪徒其曾經習教者並不追求惟當自行改悔安分以保身家勿被誘惑其歸業難民應行撫卹被燒房屋應行給價逆犯財產應

行入官各事宜撫

臣

鄂雲布已經赶到雒河集現在分

別查辦另行陳奏

臣

長齡在該處紮營二日該處居民

陸續歸來附近數十里內皆以匪犯迅速掃除歡頌

聖主洪福共享太平所有壽春鎮官兵卽令鎮

臣

德成

額就近帶回歸伍徐州官兵令鎮

臣

喜明帶領卽由宿

州回鎮其在事出力文武員弁應請量加鼓勵所有

臣

等審明定擬緣由理合具摺由驛馳

奏并繕具供單敬呈

御覽經部議奉

旨依議行

吳淞海防疏

奏爲查看吳淞海口形勢酌籌扼要巡防事宜仰祈

聖鑒事查江南省洋面南連浙境北接山東近來北洋之狼山呂四及迤西之福山劉河等口均有淺沙擁護洋面平寧惟寶山縣境之吳淞口南距浙洋不遠外有小羊馬蹟諸山堪以泊船寄定口內數十里卽係上海稅關商賈雲集往來素爲匪徒所窺伺前年蔡牽盜夥竄入卽在近口之處刦掠商船是現今江境海防吳淞口實爲第一險要臣親身逐處查看該處東岸係川沙營所轄西岸係吳淞營所轄向於兩岸濱海之處各設

炮臺盜船將至口門卽距炮臺甚近施放得力原可殲擊無遺立法實爲盡善惟從前炮位甚小臺基過高火力不及船身賊匪仍無忌憚今相度地勢就低處添設炮臺近臨水面於前次所移江寧舊存三四千觔大炮四尊外再移去四尊分架兩處臣眼同將領試將運到之炮點放鉛火直達六七里以外甚爲得準遇有匪船駛至炮力足以及之實可遏絕寇心綏安商旅因思炮臺近海面防範不可不嚴舊守炮兵丁兩岸共只八十名營房亦少兵單勢渙恐致疎虞必須添撥防兵給房駐守庶爲有備無患臣與提臣面商於簡僻營頭抽調

勁兵四百名分守兩岸以備不虞俟北風應候再酌量
撤回又洋匪來去靡常哨探賊踪尤爲捕盜先務前歲
匪船猝至得信較遲及派兵追拿已屬無及是其明驗
查盜船自浙洋北來必經川沙營洋面該營所轄之三
尖嘴挺出南洋堪以望遠自三尖嘴迤北三十六里爲
黃家灣又三十六里卽東炮臺各處近海淺灘均易登
岸擬於三尖嘴酌建瞭高臺一所選派幹兵晝夜專司
察看倘有匪船游奕卽舉小炮爲號並於沿塘添設卡
房隨聲接應頃刻直達炮臺便可相機轟擊免致臨事
周章以上添派兵丁應給口糧及增建兵卡舖房不無

所費容

臣

另行籌款妥辦並慎選勤幹備弁各二員管

領揀巡看守砲臺務使火器鳥鎗一律精熟以期緩急

足恃蓋南人體氣素弱不及北兵至施放鎗砲則恃器

而不恃力因地制宜可以轉弱爲強該備弁果能實心

出力酌量保舉以示鼓勵夫防範之法固貴精嚴追捕

之機尤須審度

臣

查閱江省水師兵丁率多孱弱性成

積習相沿已久而將領人等甫經陳大文叅處之後亦

多係生手瞬屆南風司令亟宜先事預籌今就現有大

小舢船內選擇二十隻挑兵八百名責成蘇松鎮總兵

川沙營叅將劉河營遊擊先於扼要洋面梭織哨巡嚴

飭日夜在船勤加練習探有匪徒蹤跡立即會合追拿
或浙省兵船駛至更可連踪併力以壯聲威臣俟河防
秋汛後隨時覆加校閱明示勸懲以期日久改觀漸成
勁旅再查私米出洋最關緊要臣已嚴諭守口官弁慎
密查拿儻有縱漏弊端立予懲究以冀海疆清肅奉
旨所奏甚爲明晰欽此

縷陳湖河情形疏

奏爲縷陳湖河實在情形仰祈

聖訓事竊照南河頻年漫工疊見堵築挑濬費帑不貲
臣與河臣等親身目擊焦灼萬狀欲求計出萬全一勞

永逸之法卒不可得推求其故總緣所辦工程率皆補苴於事後無暇綢繆於事前是以糜費滋多病根日重臣雖於河務不甚諳習而往來周歷聞見之際留心諮訪大約黃河根本首重隄防今河身日淤日高河隄益形卑矮外灘多與隄平隄身不能束水水至漫灘不免越過堤頂而堤內又盡屬低窪之地盛漲時處處報險幾於應接不暇卽恐顧此失彼易致疎虞自徐城至海口兩岸綿亘二千餘里雖屢經請帑培築總不過間段粘補水漲漫灘堤身仍形卑矮現在揚屬土工奏請加培銀五十三萬兩亦僅止擇要辦理仍不能保

其鞏固又雲梯關以下北岬堤工僅有十二里向不脩
守南岬堤工至竈工尾亦止七十餘里此下全無收束
逐年黃水流注海水頂托漸淤漸遠現在雲梯關至海
口已有陸路一百七八十里勢皆平行無堤束水不能
激流歸海必至下壅上潰嘉慶八年間曾經前河臣吳
璥會同徐端議請接築兩岬長堤未及舉行是以上年
陳家鋪漫工今雖合龍而自該工以下水勢平漫如故
兩岬地勢南低北高水漫於北去海不遠水漫於南勢
必淹及淮揚十數州縣甚可慮也蓋黃河挾沙而行急
則刷深緩則淤墊淤墊愈多漫灘愈甚如果洪湖清水

暢出足以敵黃則河口深通漕運挽行無礙今臣啟程時勘明河口清水尙高黃水尺許然已相去無幾萬不足恃桃汛伏汛接踵而至勢必倒灌倒灌則河口必淤重運必滯無論剝淺挑淤耗費不少且恐大溜直奔運河南下淮揚一帶水患難當是又不可不慮者又如洪澤湖堰圩堤工爲淮揚保障且可收蓄湖水以利清口情形最關緊要而近年湖底爲黃河倒灌淤高盛漲時水大至一丈七八尺高與堤平一經風浪撞擊動遭掣塌前歲五六月間幾有不能保守之勢萬一有失則淮揚皆爲澤國以上情形皆臣真知灼見患在意中不可

不及時籌備每與河

臣

等再四熟商作何補救之法據

河

臣

及在工員弁就近紳士等僉稱欲使黃流順軌莫

如普律培築大堤接築雲梯關下兩岍長堤至新淤尖而止欲救倒灌以利漕運莫如開放碭山境內之毛城舖石滾壩及脩復減壩以還舊制而備節宣欲保淮揚億萬生靈莫如培築高堰山圩堤後土坡并補脩智禮二壩跌損壩底舍是數端別無良法約計所需損之又損必須銀五六百萬兩方可補救南河全局稍除積年病根數端既舉然後得以人力專注埽工並講求前人束水挑水疏浚之法方冀漸臻完善但當此經費支絀

之時何敢輕議興築是以前次奉

旨垂詢南河現在要工需銀若干止好將應辦急工覆
奏以上各工概未敢瀆陳致煩

宵旰此實無可如何

臣

更反復思維竊謂河患不止漕

運不治而閘閘之累亦無底止湖河偶有失事不獨堵
築挑浚動輒百數十萬且蒙

恩蠲緩賑濟需費更當幾何是直以數千百萬金之錢
糧填無底之溝壑而又毫無成效實屬可惜與其將就
目前不若通籌全局若能妥爲設法預固本根使數年
之內獲慶安瀾計算錢糧卽以五六百萬計亦不過將

二三年應需之項預提用一時而所節省於將來者正復不少其理顯而易明其事切而有據但不可不慎重辦理以收實效而免虛糜用敢據實瀝陳合無仰懇

皇上天恩勅下河

臣

等再爲確查妥議以上數端行之

是否有濟此外開闢縉道另工以及海口應否酌籌分洩之路并令詳細查明務存一勞永逸之心勿徇畏難苟安之見應於何時興工勒限何時完竣分別緩急次第辦理先行覆

奏容

臣

回浦再與河臣會同查核逐一估計繪圖貼說

切實具

奏伏候

審斷施行庶於漕運生民均有裨益再此次興辦各鉅
工經費無非爲保衛田廬之用夫工料價散給民間以
民力治民生擬卽查照山東曹工之例酌分年限攤征
還欵仍俟確核後一併議奏請

旨示遵臣爲河患日深起見謹繕摺具

奏仰祈

皇上睿鑒

訓示謹

奏

一求治黃河必須先固堤堰以爲根本也黃河水性靡常變遷無定急則刷深緩則淤墊全在堤岸收束得力方不至漫溢爲患近年盛漲之時往往險工叠報搶護不遑總由河身日淤日高河堤益形卑矮外灘多與堤平堤身不能束水水至灘面卽不免越過堤頂而堤內又盡屬低窪地面一時顧此失彼易致疎虞查全河堤工雖經叠次請

經
加培不能普律估辦本年又請揚屬加培銀五十餘
兩亦僅擇要辦理今期於束水攻沙固在堵壩之逼
刷尤在堤防之鞏固計黃河南北兩岸十二廳自豫省

交界至南岸海防竈工尾止北岸至雲梯關止共長二千餘里應將堤工普律加高出盛漲水痕八尺爲度約計需銀二百餘萬兩又如雲梯關外卽明季黃河出海之口自雲梯關而下北岸堤工僅有十二里向不脩守南岸堤工至竈工尾亦止有七十餘里逐年黃水流注經海潮頂托漸淤漸遠平灘一百八十九里兩岸無堤收束不能湍激歸海嘉慶八年間前河臣吳璥會同徐端奏請接築長堤未及舉行遂有上年陳家浦漫工之事今陳工雖竣而無堤之處漫灘如故前車可鑒後患宜防計兩岸堤工就河勢建築至新淤尖止計長七萬

二千餘丈約需銀一百十餘萬兩此治河先固根本之要著也堤工旣固始可專力埽工或築挑壩或做遮埽工段長者力求其短工灣之處挑逼使直河底日深工程日穩河底一低則湖水可以暢出而漕運亦因之利涉矣

一河口倒灌之病必須起放毛城舖石滾壩并脩復減壩庶可減黃助清以利漕運也黃水倒灌洪湖兼入運河卽有礙漕運前人兼設碣石境內之毛城舖石滾壩最爲備減盛漲緊要關鍵較之現在估辦之天然峰山等閘尤爲得力蓋天然峰山約減大河之水不足十分

之一毛城鋪石壩口門寬三千丈啟放靈速流行四百餘里一路逐漸停清下注洪湖既不至湖底受墊而又可刷剔河口沙淤暢出敵黃行之莫不有效該壩自七年至今久未啟放以致倒灌之病無可救藥應於該壩臨河灘面開挑引河並加幫經由堤堰築壩鉗束庶節宣有制壩內各工約估需銀三十五六萬兩其滾壩以下之南股河淤墊較甚施工不易擬由洪溝河睢河卽達北股河估培堤堰並開引道約需銀七八十萬兩共需銀一百二十餘萬兩又清江北岸舊建王營減壩於黃淮並漲之時開放減壩水由鹽河下達北潮河歸海

該壩底係乾隆四十七年拆脩今壩底牆石損壞應行估脩以復舊制約需銀十七八萬兩此皆前人建設以救河口倒灌之機宜且於漕運大有裨益者也

一堰盱大堤關係淮揚兩郡生靈必須加培後戩土坡並補脩壩底以資保障也黃河河底逐年淤高必須多蓄湖水方能暢出敵黃淤蓄既多一遇風浪撞擊堤工易於掣塌情形甚爲危險雖曾於石工上間加磚石各工并加子堰仍不足恃十一年盛漲非賴子堰護持幾有不能保守之勢前議於石工外拋添碎石保護堤根此法最爲得力然撙節辦理亦須錢糧三百五十六萬

兩且非五六年不能成事是以停止又有議培二堤爲重門保障但仍須固守大堤相爲表裏似不若將大堤後之土堤再行加幫寬厚以資抵禦原長一萬七千餘丈內估幫一萬四千餘丈頂寬四五丈底寬十二三丈藉以挑浚二河誠一舉兩得約需銀一百五十餘萬兩又山盱五壩爲減洩洪湖盛漲而設內智禮二壩緣十一年五月內湖水陡長至一丈八尺餘寸幾與新加磚工相平除加子堰抵禦外並將智禮二壩趕緊啟放俾湖水漸消得以平穩該二壩啟放後壩脊過水丈許以致高下二丈餘尺將壩底冲跌尙未補脩急須普律估

辦以遵舊制以備異漲并將壩底加高則節宣有制破
閉隨時共約估需銀二十八萬兩蓋洪澤湖底歷年
爲黃河倒灌日漸淤墊以致堰圩情形著重設有疎虞
不獨淮揚盡爲澤國漕運因之阻滯且堵塞清水漫口
倍難於黃水此又不可不防患於未然者也

以上所開各工皆係目前至緊至要之務南河轉關在
此一舉惟現當撥項支絀之際一切經費必須熟籌因
查前河臣靳輔曾有議徵修河銀及加徵關稅之請以
爲河患旣息閭閻得安耕鑿商民獲免險阻之虞利害
所判出入甚大卽於每石少加輸納以還

國帑揆之情理亦兩無妨礙載在奏疏班班可考又查山東曹工溢用至八百餘萬兩經前署撫岳起奏請攤徵還欸得

旨允准現在奉行又現辦天然峰山等閘工程亦照例於江安藩庫墊發分年攤徵還欸各在案蓋緣此項經費無非爲保衛田廬之用以民力治民生理之當然毫無勉強今若行舉大工自應倣照曹工辦理伏查河臣戴均元前夾片奏請暫開捐例原非得已今旣不便屢開若仍倣照前河督靳輔奏捐土方辦法似尙可行現在願來南河投効者尙不乏人所有此項經費擬先儘

投効之項其不敷之數卽比照曹工分別官民攤徵歸
欵又查山東鹽課地丁計銀四百餘萬兩江安兩省計
銀一千餘萬兩若仍分限十年歸欵辦理較易又有成
案可循並非創舉至各工不能一時並舉自應酌分緩
急次第趕辦如堰圩堤工應先山圩而後高堰全河大
堤應先揚屬而後徐屬均分限二年辦完可無歧悞至
啟放毛城舖則須一氣呵成於本年秋汛後興工務限
明年大汛前完竣方可有濟而兩年之內各運關藩庫
陸續借撥亦不致掣肘也又向來投効由河督收呈河
庫收銀未免易滋物議茲辦大工應請令各生就近於

各省藩司及戶部具呈上兌咨明河督陸續撥解工次其數目條欵議敘悉做照衡工捐例該官生等自必踴躍急公不致竟無成效况堰圩爲淮揚保障如果淮南北商人情願捐輸報効仍應仰懇

聖恩俯如所請如此酌爲籌畫則經費亦不虞無著矣再各工經費約共需銀六百餘萬兩合併陳明奏上上嘉納之

籌辦海防章程疏

奏爲籌議吳淞口防海章程分條陳奏

一沿海居民通盜濟匪誠不能保其必無但查向來蔡

逆偶竄江南總在馬蹟山寄旋距寶山等縣七八百里
非閩浙泊舟近岸可比閩浙洋面島嶼甚多處處可供
樵汲溫合糧價較賤出口較便蔡逆之小米火藥尙無
須江南接濟惟江境沿海奸徒以私米出洋或賣與鹽
梟或接濟土盜其火藥鉛彈等物或在沿海深僻處所
配製或竟賄通營局陸續私製亦未可定臣等酌議除
商船出入之吳淞口等大口岸應由各關稽查外其餘
沿海各廳縣境內一切舟楫可通之口岸應飭令各該
廳縣澈底查明將必須船隻往來者酌留數處建立柵
欄依時啟閉其餘支河小港概行釘椿截堵各分段落

專委試用佐雜一員在彼駐劄巡查凡南滙之杉板魚船不許違例出境上海之提載小船永禁打造以杜潛越出口其餘應行出口之船亦查驗門牌確鑿人照相符實無違禁物件方准放行並不許停留口外海灘擲延多日致將違禁各物由陸挑運冀圖偷漏再於海口附近村莊留心訪查有犯必獲該委員等限以三個月爲滿另爲更替不令久居其地卽跟役人等亦無從勾串仍分別勤惰功過信賞必罰各委員亦必踴躍奮勉認真辦理不致虛應故事而偷漏接濟之弊自絕矣

一編查保甲之法地方官若果實力奉行奸匪何能托

足無如辦理不善胥役藉端滋擾遂致因噎廢食置之
不辦誠如

聖諭此皆無能畏事之見臣等酌議先就沿海廳縣照
例實力舉行向來編查每先城市而後鄉村今清釐盜
源尤須先辦鄉鎮照例設立門牌書寫男丁年歲作何
生業並婦女幼孩傭僕婢媼共若干名不許一名遺漏
其遷移別處者必須將舊牌交甲長繳銷不得私自攜
帶他往其新遷入甲者預向甲長告知報縣另給新牌
方准在甲居住甲長所管僅止十家不難稽查如有容
留面生可疑之人或出入無時踪跡詭秘或有他處貨

物突然運至立即赴縣稟報照例記功獎賞倘敢通同
徇隱別經發覺甲長一體治罪外來流寓之戶如房主
甲長信任無他即與土著烟戶一體編入甲內儻該客
民不願入甲者即勒令回籍毋稍寬縱再上海黃浦二
帶向有閩廣浙省流民其中失業無賴之徒諒亦不少
口音既異稽察宜嚴應委員查明人數造冊責令各會
館董事稽管勒限一月內着令僱覓便舟配搭回籍不
許容留居住至一切船隻最易藏奸較陸地烟戶更爲
輿繁應即於本家門牌內註明有農船魚船幾隻給以
縣印小照粘貼船上以杜影混其餘攬載船隻及以船

爲家之網船無論何項名目均給船照凡民間僱用及載魚銷變必由行埠寫載發販行埠先驗有照之船方准留埠代爲寫僱則洋匪不能混入卽陸地盜賊亦無從托足矣

一洋盜刦得貨物必運至內地銷賣洋盜需用衣物必從內地購買且恐盜匪在洋刦奪商貨明知私運不能進口竟連客商船隻照票一併刦取裝載贓物令盜夥假冒商客公然進口完稅銷貨置貨關上員役雖查驗人照是否相符而年貌聲音不能辨別卽行店人等亦只查其有無夾帶違礙物貨不能窮其踪跡臣等酌議

上海地方閩廣浙江各省均設會館各有董事多人嗣凡有商船到口先令董事審辨土音盤詢居址設有可疑卽密稟查拿果係真正商販出具保結然後准其進口銷售迨銷變完竣置貨而回或本省商民僱覓運貨出口各省之船卽由何省會館出具保結盤查點驗計口酌給米糧然後放行倘仍有盜匪假冒進口及私運米糧火藥出口之事將該董事一併治罪再如有爲盜匪囤積貨物銷買贓物者准其據實首報卽將盜贓全行賞給旣免其通盜之罪又可坐得厚資愚民有所貪圖奸民亦不敢信托行之以實不特米糧無從偷漏卽

盜賊亦無由進口矣

一委員巡查河道船隻及編查保甲之法若不實力奉行則防弊適以滋弊且恐日久懈生仍屬有名無實臣等酌議應於每年春秋二季派委藩臬兩司輪流親往察勘以昭慎重抽查船照門牌是否相符嚴申禁令使地方文武員弁及委員人等有所警惕格外認真辦理水陸商民知官府慎重海防不肯虛應故事亦必互相戒勉矢爲良善不敢容留匪徒自蹈法網再營汛弁兵責在巡邏如果能拿獲真正銷贓濟匪之犯審訊得實卽將盜賊全行賞給委員巡役拿獲亦如之但不得無

梅庵文鈔

卷二

三

故妄拿希圖紮詐以及紮詐不遂誣陷平民並將真正匪徒得錢賣放察出從重究治該管之備弁及委員等一體叅辦如此則令甲嚴明而盜風自可漸息矣奏上奉

旨實力辦理期有成效欽此

籌議河務事宜疏

奏爲籌議河務事宜敬陳管見仰祈

聖鑒事竊河務爲漕運攸關生民是賴地方要件無有大於此者況臣有兼管河務之責何敢不盡心力以求一當臣抵清江已及一月有餘日夜講求兼考載籍細

思受病之源以籌補救之法伏查河防之病論者紛如聚訟有謂海口不利者有謂洪湖淤墊者有謂河身高仰者臣未親見之前亦執此說茲詳細推求海口淤高自前明已有此議明臣潘季馴疏稱雲梯關外沙積成灘中間行水之路不及十分之一然海口故道則廣自二三里至十餘里若兩河之水全歸故道海口可仍全復等語是海口視黃流爲通塞黃水藉清水以刷滌自昔已然現經河臣徐端屢次親勘海口寬千餘丈攔門沙之上過水深五六尺實無壅遏其形勢尙較勝於潘季馴治河時且本年黃水六月二十以前並無倒灌入

運全河俱東趨入海不見停阻設果壅遏爲患何以大河之水仍滔滔順軌而東此理至明一言可決況從古無浚海之法亦無另改海口之處此說竟可勿論矣洪湖淤壅前河

臣

靳輔疏載彼時湖中止存小河一道寬

十餘丈深五六尺至一二丈不等今則汪洋浩瀚湖面寬數百里深至二三丈不等較靳輔時大不相同又豈得反諉爲淤淺況清水之敵黃所爭在高下而不在深淺此說又可無論矣惟河身擡高誠有此病詢之在工員弁兵夫瀕河紳士僉稱嘉慶七八九等年黃河底淤高八九尺至一丈不等是以清水不能外出河口之病

實由於此但黃河之通塞靡常變遷無定歷考載籍有時上滯而下通有時上深而下淺井有時上下皆深而中段忽然淺澀實係黃河自然之勢卽如徐州一帶素稱極險之工動輒泛漲近年則水不出槽河底刷深豈盡人力所致且大河遼遠巨浸茫茫亦萬無水底挑撈之理是此說亦只可存而勿論矣臣因有此三說以爲有一於此是以人力與天地爭功難期奏效及叅觀明臣潘季馴及前河臣靳輔等奏議其治河之法全不治此三病而專心致意於清口誠以清水暢出則河腹刷深海口亦順而洪湖不至泛溢行之有效歷歷足徵臣

因再四思維目下受病之處與昔正同雖現在河身淤高亦由歷久之間壩多傷各處之支河漸塞以致清口日淤下游受害治法尤以復清口舊規疏洪湖歸路爲目下刻不容緩之急務前歲衡工合龍之後清口大淤自惠濟祠至彭家馬頭一片淤成乾地至今仍由引河行船黃水一長河口卽淺其病一也惠濟等三閘金門年久損壞難下嚴板啟閉不靈其病二也洪湖義壩掣通壩底被沖洩水太甚現在趕緊購料運土以期堵閉其他四壩亦須大加脩理其病三也爲今之計惟有大修閘壩全復舊規去新受之病收蓄洩之利借湖水刷

沙而黃河治湖水有路入黃不虞壅漲而湖水亦治細
按情形舍此別無辦法至洪澤湖以數百里湖面水深
至數丈駭浪奔騰一遇西北風勢在危險欲藉湖水以
刷黃則不能不多爲收蓄欲多蓄湖水則不能不保護
石堤欲保護石堤尤不可不急籌去路若不設法宣洩
水長一尺則堰低一尺加到何處爲止臣與河臣徐端
通盤籌議湖水固宜收蓄異漲尤不可不防今年湖水
盛於往年全賴義壩減洩得保無事是欲守護高堰先
須將山盱仁義禮智信各壩底脩砌堅固以備節宣俾
得掄縱由人下游不至泛漲然後由高郵大壩疏浚支

河以通入海之路將人字河岔稻河鹽河一律挑通以疏入江之路復還靳輔原開河道之舊則高堰可保而下游州縣亦不至受淹此又慎脩五壩之節宜以衛下河田廬之至計而非目前苟且補苴之圖也臣伏念古法可遵而不可泥人言可參而不可廢一已之見識難恃鄉人之聞見較真現在同大小臣工悉心籌議並出示淮揚二府土著紳衿耆老有洞悉本地機宜者召令來淮虛心博採俟折衷定議然後派委精細妥員先往查看再與河臣親身履勘酌定辦法奏明於秋汛後同力合作河員不足則兼派地方經費不足則薄藉民力

務求一勞永逸之法以利漕運而奠民居事關重大不敢不慎之於始以籌全局奉

旨所奏甚爲明晰欽此

籌議阿克蘇錢局章程疏

奏爲酌定錢局章程以清積弊條晰具奏仰祈

聖鑒事竊查阿克蘇錢局每年採買各項不過報銷錢二十餘串其中雖小有錯悞尙無弊竇惟一切收銅鑄錢全委之本局章京章京草率以致滋生弊端致有局員隱匿餘錢之案臣等現已查明據實叅辦從前積弊今已革除但不明立章程誠恐因循日久復滋流弊臣

等悉心妥議酌擬六條謹眉列於左伏候

聖裁

一交納銅觔應令辦事大臣親往稱驗也查該局每年額收廠銅一萬三千二百觔回子銅七千九百一十餘觔向來稱收銅觔俱係局員經手並不稟請辦事大臣查驗是以銅之多寡秤之高低全憑該章京爲政致有局員隱匿之弊應請嗣後廠兵回子交銅到局該局員不許將原封鞘袋拆動卽時稟請辦事大臣赴局眼同稱驗核明餘銅觔數於驗收冊內註明俟鼓鑄完竣後與所報錢數比較核算並令該局於開卯鼓鑄時添設

小票一張填明每日鑄錢若干實數按日報明辦事大臣以杜欺隱之弊

一回子銅筋應不准多加秤頭以示體卹也查錢局向來稱收廠銅回子銅一律皆以高杆秤收廠銅每百筋多收秤頭七筋二兩回子銅因銅質不淨每百筋向加八筋又加秤頭則每百筋卽多至十五筋查銅廠兵丁本爲鼓鑄而設所得銅筋本應盡數歸局向旣每百筋加七筋二兩稱收應令照舊交納回子銅係該伯克向散衆回子征收彙齊交局與廠兵不同旣已每百筋加耗八筋卽有餘銅在內自未便再加秤頭應請嗣後回

子銅除每百觔加火耗八觔外不得額外再加秤頭以示體卹回民之意

一錢局銅秤應仍用原頒舊秤與廠秤一律以免弊混也查該局現有銅秤二桿係立局後藩庫所頒俱較廠秤稍弱所以收銅時每百觔在廠秤不過高旺在局秤卽多至七觔有餘鑄錢時每十串又須加重二三觔始符定例七十五觔之數總因廠秤局秤未能畫一以致出入參差易滋弊混查該局前在烏什本有舊秤一桿係錢局未移時所用臣等調來與廠秤當堂比較輕重如一應令該局嗣後仍用烏什舊秤以此秤收銅卽以

此秤出錢出納均平則錢觔不至輕短不必例外加重
自不致各城有駁換之虞其現用局秤一送烏什尋常
備用一卽銷毀以杜輕出重入之弊

一局中收銅宜一律改用平秤以免高下其手也查秤
必平稱方有準向因局秤稍軟遂用高秤稱收今旣改
用原頒舊秤自應一律平稱以昭公允查原頒舊秤每
百觔較來局秤重二觔半卽以此核算嗣後回子銅除
請免多加秤頭七觔外每百觔加耗銅五觔八兩仍合
原加八觔之數廠銅每百觔加銅四觔十兩仍合原加
七觔二兩之數一律用平秤稱收旣與原交分兩無所

水月三金 卷二 三
增加亦不至任意高旺致滋弊混則局員一切勒索影射之弊不杜而自絕矣

一此次查出餘錢應核定實數分別報銷也該局從前廠銅回子銅一律加秤稱收是以每年得餘錢一百八九十串今回銅既不許多加秤頭又換用舊秤則餘銅較少餘錢一百二十串問之匠役往往陶渣不能足數卽在餘銅內補足今餘銅全行入官不能通融恐難湊足原數又柴炭山場因歷年採伐離局漸遠額設車輛牛隻不敷駄運不得不添設牛駝旣添牛駝必增草料又回漢匠役辛苦異常向來例賞外該局又須加賞從

前局員因有欺隱餘錢卽自行通融辦理今積弊旣清局員無項可貼自應官爲籌備惟此等費用俱應實用實銷礙難預定數目現在秋局卽日開卯臣托雲泰親率署糧餉章京色拉布實力稽查悉心經理俟鼓鑄完竣查明實在多鑄餘錢若干局內應用各項實在不敷若干卽以本年秋局爲準核定確數再行奏明辦理

一錢局採買料物應全行咨部核定價值以昭核實也查錢局鼓鑄所需一切料物不得不向回民採買該局於嘉慶四年自烏什移來一切應買物件有一定部價者歷來仿照辦理本未盡一其歷年相沿價值又較現

在市價不無多寡懸殊之處所以珠爾杭阿疑其短發以致呈控臣等公同酌議除定有部價各項飭令局員遵照給發外其向來未定部價各條應令局員逐項開單註明歷年相沿價值及現在市價咨請部示酌中定價以便遵行

以上六條俱係實在情形臣等細爲籌畫是否可行伏乞

皇上睿鑒

訓示再臣鐵保將一切辦理完竣於初六日仍回喀什噶爾合併陳明謹

奏

恭謝 恩加三品卿銜疏

奏爲恭謝

天恩仰祈

聖鑒事本月十三日奉

旨鐵保著賞給三品卿銜休致欽此

臣聞

命之下感激涕零實出夢想之外竊

臣

滿洲世僕至愚

極陋由乾隆三十七年進士蒙

恩外用至總督內用至尙書才疎福薄屢獲愆尤不能

仰體

高厚乃復蒙

恩棄瑕錄用授職洗馬回京供職本期竭盡駑駘勉圖
報效以上副

恩遇於萬一乃自上年二月因目疾復發請假兩月入
冬後至今目疾增劇一時難望速痊不敢戀棧曠職萬
不得已呈請暫行開缺今蒙

皇上

天恩賞給三品卿銜休致

臣

自分何人乃蒙

皇上逾格

恩施體恤矜憐無微不至所有感激下忱謹力疾恭詣

闕廷叩謝

天恩

臣

不勝惶悚瞻依之至恭摺具

奏謹

長子瑞元鄉試中式謝

恩疏

奏爲恭謝

天恩仰乞

聖鑒事竊

臣

長子瑞元年二十八歲由嘉慶三年廕生

蒙

梅庵文鈔

卷二

三

恩賞給主事籤掣刑部行走於嘉慶二十四年提牢任內因公去職奏明降捐司務加捐員外郎奏留刑部恭逢道光元年

恩科鄉試中式一百五十一名舉人

臣

聞報之下感激

歡忭莫可名言竊

臣

由乾隆三十七年進士莅任中外

五十餘年兩典會試三任鄉闈又與胞弟玉保同任翰林學士并同任侍郎沐遭遇之殊常實夢想所不到今瑞元鄉闈五次復列一科喜傳儒素於家庭幸與賢書於

聖代

臣

衰老龍鍾不能稍効犬馬惟有嚴諭瑞元并次

子瑞恩努力當差不負科名以仰報我

皇上養育成全之至意謹率同瑞元泥首

闕廷恭謝

天恩所有感激下忱理合恭摺具

奏謹

奏